

14/05/2000

Insentif RM3 bagi setiap pendaftaran pemilih

KUALA LUMPUR: Majlis Tertinggi (MT) memutuskan untuk memberi insentif sebanyak RM3 bagi setiap pendaftaran pemilih yang dibuat oleh cawangan dalam tempoh Pendaftaran dan Penyemakan 2000 yang kini dijalankan Suruhanjaya Pilihan Raya (SPR).

Sehubungan itu, Naib Presiden Umno, Datuk Seri Najib Tun Razak (gambar), meminta cawangan mendaftar segera ahli sebagai pemilih dalam tempoh pendaftaran mulai 9 Mei lalu hingga 21 Jun depan.

"MT memutuskan untuk memberi galakan ini bagi memastikan ahli yang layak mengundi, mendaftar sebagai pemilih," katanya ketika menggulung perbahasan pada akhir Perhimpunan Agung Umno di Pusat Dagangan Dunia Putra (PWTC), semalam.

Mengenai usaha mengukuhkan parti, beliau berkata semua ahli MT sudah diarah mengenal pasti 10 orang untuk dijadikan kumpulan teras bagi mendengar amanat Presiden Umno, Datuk Seri Dr Mahathir Mohamad.

"Presiden sudah memulakan kursus sehari dengan semua ahli MT dan mereka masing-masing diminta mengemukakan 10 calon untuk mendengar amanat Presiden," katanya menjawab desakan perwakilan yang meminta institusi latihan parti diwujudkan segera.

Najib berkata, tindakan mewujudkan program latihan secara besar-besaran kini pada peringkat menggubal perisian yang dilakukan oleh sebuah jawatankuasa khas.

Sehubungan itu, beliau meminta ahli bekerja dengan lebih kuat secara berpasukan bagi mengukuh dan merapatkan perpaduan.

Katanya, ungkapan parti harus menguasai kerajaan dan bukannya kerajaan menguasai parti harus difikirkan secara kritis bagi memastikan langkah positif diambil untuk mengekalkan kuasa politik Umno dalam kerajaan.

(END)